



STINAPA TA INFORMA

REPEATERS

Boneiru tin un porsentahe haltu di “repeaters”. Esaki ta turista ku ta bin bèk kada biaha. Nos isla ta atraé asina fuerte ku nan no tin nodi di pensa hopi pa disidí unda nan ta bai ku fakansi. Nos Ofisina di Turismo ta hopi kontentu ku esei i p’esei nan ta parti medaya di bròns, plata i oro na turista ku a yega di bin hopi biaha kaba. Boneiru tin asina hopi ‘repeaters’ ku bo lo pensa ku e forma di “boomerang” ku nos isla tin, tin di haber ku esei. Pasobra un boomerang ta bin bèk ni maske kon leu bo ta tir’é. Banda di esei tin hopi hende ku ta bin pasa temporada di invierno akinan. Den e mundu di para tambe nos konosé e fenómeno di ‘repeaters’. Pero nos no ta yam’é asina. Di e masomé nos 200 tipo di para ku ta aparesé riba nos isla, ta 55 di nan so ta para ku ta brui akinan mes tambe. E sobrá ta paranan ku ta biaha di un kontinente pa otro i tambe esnan ku ta bin pasa invierno akinan, òf paseante ku a baha akinan pa kasualidat. E mayoria di paranan ‘biahadó’ i esnan ku ta pasa invierno akinan, ta sortonan di para ku en realidat ta originá na Sur Amérika. I tambe bo ta haña para akinan ku ta típiko di e region di Karibe. E meskla aki ta hasi nos isla asina atraktivo pa amantenan di para. Den e aña di biodiversidat ta interesante pa studia algun ‘repeater’ un tiki mas di aserka. E fèrfdó di boto, un bishitante for di Nort Amérika, ta konosí pa nos tur. E para di playa aki tin e bachi di pluma interesante; den mayoria maron ku pretu, ku un barika blanku i pia kòrá. Nan sa kana bai bin den grupo chikitu, i ta kana rondia kuminda kant’i awa. E para aki ta brui hopi leu den regionnan nort, kaminda sa ta hopi friu. Pero fèrfdó di boto ku no ta brui por ser mirá den tempu di verano den áreanan tropikal. Ta p’esei nos sa mira nan hinter aña bai. Si bo paga tinu bon, lo bo ripará ku hopi biaha tin fèrfdó di boto ku falta un òf mas ded’i pia. Ta kon esei lo ta posibel? Un otro para di Nort Amérika ta e kahela. E meuchi aki por ser rekonosé bon na su kabes prètu i su harí diabólíko. Nan tin un barika blanku, lomba i hala shinishi. Banda di mart pa aprel nan ta yega nos isla i nan ta keda hinter e verano. Ora sèptèmber yega nan ta disparsé. Ku nan harí típiko bo sa mesora tambe ku nan a yega bèk. Nan ta e úniko sorto di meuchi ku ta brui den área di Karibe, pues tambe riba Boneiru i Klein Bonaire. Nos bunita isla pues no ta atraé turista so, pero hopi para tambe.

Skirbí pa V. van Baronie

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURESA



Traha huntu na un desaroyo duradero pa Boneiru